

PAAVORO ITIONCAJINIRI TIMOTEO

Antsatantaquemparoca

Ocatica iroguenti antsatantaquemparoca paperi mavitetapojsica itioncacaantaqueca Paavoro itioncaquenerigueti Timoteo. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1-31; 13.1–28.31), aisa itioncacotaqueri Timoteo paperiqui Yantajiguica 16.1-3; 17.13-16; 18.5; 19.22; 20.4. Ocatica paperi iroguenti teroncapojatsica itioncacaantaqueca Paavoro, choocaquea otsipa 12 paperipae itioncacaantaqueca choocajianquitsica paperiqui icantajitica *Tsavetacoquerica Jesoquirishito*. Itioncacaantaquero ocatica paperi ajagantsiniqui 64, ichoocaquegueti Iromaqi, pajinigueti irimetojaque. Itioncacaanquerogueti iriguenti itsipataja Irocashi, tee irovashianteriji (4.11).

Itioncacaantaquero ocatica paperi itsaquetari irooshipojo imetojajitaqueri, inintaque intampishishirentacaqueri Timoteo aisa icantaqueri quero incoquempani inchoocaquegueti cameetsa (1.3-14; 2.1-13; 3.14–4.2, 5). Aisa itsatacaaqueri aatoja iquemisantiritsi tsatacaantajiguiroca teeca iroomajateji (1.15-18; 2.14–3.9; 4.3-4). Icamantacotaca quero incojitaquerini (3.10-13; 4.6-8, 14-18). Aisa icanqueri Timoteo iramajeri Maricoshi aisa yashintaguetacaca Paavoro yoanaqueca ontaniqui (4.9-13, 21).

¹ Naroguenti Paavoro itigarancane Jeso quirishito, iriguentiquea nintaca aquenaro Aapani Irioshi nontsavetantaquero quea icantaca acajica icanquegueti iranijaca ajaji Quirishito Jesoshi. ² Imaica nontionca que empi, irijani Timoteo nopint samajatacaca. Namana coventa quempi incavint sajamajaja que empinijite Aapani Irioshi aisa Amajirote Jeso quirishito, impint satacota que empinijite, inchoocata caaji aquempinijite cameetsa aatonijite taaca opaji pishoshoguite ventajigatsi.

Aatojate itsaroguitsi intsavetantaquerigueti Jeso quirishito

³ Nocoguitani tsiteniriqui aisa savincagu teriqui namana querigueti Aapani Irioshi noquenqueja pinita quempi, nocanqueri: "Arioteesa." Iriguentiquea notsaro ventacaca, noquempetacari choviquijiana quenaca, tee quea onchoocateji nanta queca chagashirenta quenaneca. ⁴ Noquenqueja jiro pijaquia, nonintantacaca namenaja tempiquea imaica cameetsanijite noshineva eque mpanijite. ⁵ Aisa noquenquejaco quempi pitsaro ventamajata cariquea Aapani Irioshi piquempemajajiacar oquea pishaote Iroira aisa piniro Eonise. Notsamaja quequea arimajaca piquempejia caro quea iroati mpajia pitsaro ventamajajiacar quea.

⁶ Irootaque queea nonintantacaca nonquenquejaca aja jepiroja coramani nopamiquempi gueti pishinqui reguishi qui yagavejaca anquempica Aapani Irioshi pintsavetanta vaeque. Imaica

noncanquemquea pintampishiventerojate.
⁷ Teetarite irooquea intigaranquimenteriji Aapani Irioshi Ishire antsaroajiaquequea, iroguenti itigaranquimenqueriquea iragavejacaamajacaji, aisa cameetsanijite ampintsamajaji-aquemparinijite maasano caquinteguetatsica, aisa antsajiaqueniji anquenquejamajaque anchoocatimenqueniji cameetsa. ⁸ Imaica noncanquemquea aatoquea pipashiventatsi pintsavetantavaequerigueti Amajirote. Aisa naatimpa aatoquea pipashiventacaanatsi pamenaquenagueti isantanatacotimentajiquenaro notsavetantavaequerigueti. Manaquea pinquejetaquenaja pantsipeventaquemparo Quenquetsatsarentsimajaca Oganejencatatsica, iriotaque tampishitacaajiaquempineca Aapani Irioshi. ⁹ Iriatimpa imeshiajiacaji, aisa icajemantacajica asavicaventajiaqueroniji inintaguatica, ancomajamajajiaquempa. Teequea irooquea incajemacotantaji agameetsareni, inchiquiojitaquea iriatimpa inintacaajiacaji. Icocani icavintsajajiacaji paesatoniqui tequeratagueti onchoocatimateji, icantacoguitani coramani inintaguitini Aapani Irioshi incavintsajajiacaji Quirishito Jesoshi, ¹⁰ cotanquitsquea imaica yonigaajiacajiro iconijataquegueti Meshiantatsica Quirishito Jesoshi icoraquequitigueti, yanaavaetaquitiroquea metojanentsi, ariquea itigarancacajiro Quenquetsatsarentsi Oganejencatatsica, irooquea atsatantacaroca anijagantsimajaca, oguiconijatacapiroquea quero ancojiajempani ancoguitepaniniji anijaguiteni. ¹¹ Irooquea

inintacaaqueñaca Aapani Irioshi nontsave-tantavaeque, ipeacaaqueñaquea itigarancane aisa tsatacaantantatsica nontsatacaaqueñiniji teeca irijorijoigueji. ¹² Irootaquequea natsipevaetantacaca, cotanquitsiquea teequea nompashiventacaguemparojoj isantanatacoti-menquenarogueti notsavetantavaequerogueti, notsaquetarite queri navencaca. Aisa notsamajaquequea aatoquea yamatavijanatsi, yagavejamajati inquempoguijamajataquenaro nojoquitajanarica, arimpaquea incavintsajacomajatanaquena arejevaetapojempa incoraquetajategueti.

¹³ Ariqueate imaica pintsatacaantavae-querogueti pintampaticamajatanaqueroquea Quenquetsatsarentsimajaca notsatacaaque-mpica, aatoquea picantashitatigarotsija. Pin-quemisantamajatanaquerija Quirishito Jesoshi, aisa pimpintsamajataquemparijate papit-saroventarijate. ¹⁴ Pintsavetantavaequereroquea Iguenquetsatsare Aapani Irioshi yojocajitaque-mpica, pintampaticamajateroja pincanquero, iriguentiquea agavejacaaqueñpine Ishire Aapani Irioshi choocashirentajiacajica.

¹⁵ Pitsaquequea maasano quintenijiatsica Ashiaqui yovashiantajianajana, iquejejiaca Pijero aisa Eremojene. ¹⁶ Namanacoventajiaqueriquea ijitanepae Oneshiporo impintsatacojiaqueñpari Amajirote. Iriatimpa icavintsajapiniquena ishinetacaajatana, teequea impashiven-tacaguénaji isantanatacojitaquenagueti. ¹⁷ Quempetaca yarejetapojacaguetai ocaniqui Iromaqui icoapojana yamenaguevetapojana,

itsitacavaepojajiro, ariquea yamenapojaajana.
 18 Namanacovenqueri incavintsajamajaqueriquea Amajirote incoraquetajategueti oncoramanitapojaqueta. Aviatimpa pitsaquetarite yamitacovaequenaquea nochoocaquitigueta Epesoquiniqui.

2

Pinquempetaquemparija *igoaretae*
Jesoquirishito

1 Imaica, irijani, arimpaquea pintampishitashimajatanaqueroquea maasanopae intaguetica Aapani Irioshi, iriguenti tampishitacaquempine Quirishito Jesoshi.
 2 Oraqueate maasanopae piquemaquenaca notsatacaantavaequegueti icapiocapini-jiacagueti tsaroventajiacarica, imaica aviguentiquea tsatacaaajajerineca itsipapae papitsaroventarijiate comajamajajianquitsica agavejajianquitsineca intsatacaajiaqueriquea itsipapae. 3 Aisa pinquempetaquenaja naatimpa pantsipetacovaequemparoqua maasanopae, pisavicaventamajaquerojate maasanopae intaguetica Amajirote Jesoquirishito, pinquempetaquempariquea coareta isavicaventirogueti maasanopae intaguetica imajirote. 4 Iriraquea coareta teequea inquenquejeroji inintaqueca iriatimpa, iroguentiquea isavicaventavaequequea taaca opaji icanquerica imajirote cameetsanijite

irishinetacaquemparinijite. ⁵ Ariquea iquempetaca neshintsicatavacagatsica iramenajitaqueriniji queri tampishimajatanquitsica, aatogueti inetsanatavaquero incantajiquerica, taampina iroguisotoitsijiquempari, aatoquea yojocajitiniri amatsaerontsi inintacajaivetacanarica iranaantaquemegueti. ⁶ Arikea iquempetaca aisa vintyaquitaroca oitsoqui, iriquetiquea aavajatsine. ⁷ Pinquenquejacoterojate ocatica nocanquempica. Inchiquiojiquea iragavejacaquempi Amajirote pinquemamajataqueronijite maasanopae.

Inquenquejamajaquerija Jesoquirishito

⁸ Pincoquempanijate pinquenquejamajaquerija Jesoquirishito ichoviquitanaqueca Taavini, iriotaquequea pochatanajatsica imetojavetacagueti. Irootaquequea Quenquetsatsarentsi Oganejencatatsica notsavetantaqueca. ⁹ Arikeate natsipeventavaecaroquea, icavorejatsatacojiquena, iquempetacaavaequeñaquea metojantatsica. Cotanquitsiquea oraqueate Iguenquetsatsare Aapani Irioshi aatoquea icavorejatsatacojitiro, arimpaquea ontsitacaguitejavaetanaquempa. ¹⁰ Natsipetacovaecaroquea taaca opajitapae, iriguentiquea natsipeventavaetaca maasano icoguiajiaqueca Aapani Irioshi, noninquequea iraventaventajitanaqueempari Quirishito Jesoshi irimeshiajiaquerinijite, iroaroaitanaquequea ichoocatigueti Aapani Irioshi incoguitempani inchoocaguiten.

¹¹ Iroomajaca ocatica icantajitica:

Imetojanaquegueti Quirishito atsipajianacari, anchoocatantajiapoajempaca iriatimpaqui.

12 Arigueti antsipevenquempari, anquejema-jirontaquempari.

Managueti ancantajiaque: “Teetarite nontsateriji”, ariqueate inquempetaquempa iriatimpa incanque: “Teequea nontsateriji.”

13 Arigueti avashiantajianajeri, iriatimpa arimpaqueate irinetsanamajatanaqueroquea maasanopae icantaguequeca, teetarite iragavejempaji iramataguempaji.

Antamajaqueneri Aapani Irioshi irishineventantacajica

14 Pinquenquejacaajiaquerijate papitsaroven-tarijiate maasanopae ocatica nocantague-quempica. Iramenajiaquempiquea Amajirote pintsatacaaquerigueti. Pincantajiaqueriquea inquemavacaajiaquempaja, aatoja queroca icotavacaajiatsi. Oraqueate incotavacaja-iaquempagueti querocampate incojiaqueroni, yovashiantacaguiritsi quemaquemaiquerica.

15 Pantamajaquenerija Aapani Irioshi irishineventantaquempica aatonijite ochoocatitsi querocampate oguipashiventajaquempineca oncoramanitapoajegueti. Pintsatacaaantama-jatanaquerojate Quenquetsatsarentsimajaca, aatojate picantashitatiimatarojate. **16** Aatojate picantaguisheta, aisa aatoja picantashiguetatsi intati. Iriraqueate quejequeroca arimpaquea impeacaagushevaetanaquemparo covaeguish-erentsi. **17** Oraqueate itsatacaaantajiaqueca

quempejiguiroca imaica arimpaquea ontsitacaguitejavaetanaquemparoquea, manaquea onquempetaquemparo ompatsajanaquegueti ateshi. Jero yovashiantantajianajaroca itsaroventajiavecarigueti Amajirote. Aritarite iquempejianaqueroquea Imeneo aisa Pireto.

¹⁸ Iriatimpajia iroguenti icantashitatijianacaroquea Quenquetsatsarentsimajaca, icantajiaque: “Jac avisanaque itancoretancor eitantajitaca.” Iquejejianaquerogueti imaica manaqueate yovashiantacaagarantajiaqueri tsaroventajavetatsica. ¹⁹ Cotanquitsiquea quempetaca tsovironaqui ivinchajacojitirogueti oquishomajatigueti, oraticaquea tsovironaqui ipeacaacaca Aapani Irioshi quishovaeque,* aritarite itioncacojiquerogueti ocanque: “Iriraquea Amajirote itsamajati querica yashintamajatacaca.” Aisa ocanque: “Maasano aventacaroca ivajiro Amajirote, iiintsijate irovashiantaguetanaqueroja maasanopae covaeguisherentsi.”

²⁰ Oraqueate tsovironaqui qui caratsantsanaquivaetanquitsica ochoocaguetaque quea ipijatantajiguetaroca taaca opajitapae. Oconoagarantacaquea ipeacaantajiguetaroca cavorejatatsica icantajitica ooro, otsipa icantajitica perata. Ochoocagarantsitaquea ipeacaantajiguetaroca inchatomenta, otsipapae

* **2:19** Maasano tsaroventajiacarica Jesoquirishito aquempejicaro tsovironaqui ipeacaacaca Aapani Irioshi. Jesoshi iriguenti quempecaroca quishotacaaquerroca. (Pamenero 1 Co. 3.9-11.) Maasano aventaventaquemparineca aato ipega.

ivinchajantajiguetaroca quepatsi. Oconoagarantaca ishineventamajatacaro iraapinitero, otsipapae manaquea itariantajicaro cajarashitequi. ²¹ Quericagueti shetacaantaqueroneca igovaeguishere pishoncamajatanajeroneca covaeguisherentsi, inquempetanajemparoquea ipijatantajitaca ishinevencaca ashincaroca. Irishineventsitempariquea Ashincarica iragavejaque intigaranquitsitempari irinet-sanaguequeneri taaca opajitapae cameetsaripae inintaguequeca.

²² Pintomicaguenquejanetapisapanajanteroja inintaguishetaqueca iriaqueraca quenquevar-ijiananquitsica. Arimpaquea pincomajama-jatanaquempaja, pintsaroventamajatanaqueemparija Jesoquirishito, pimpintsatantempaja, aisa pinconoajiaquemparija comajashirentajiatsica amanajiguirica Amajirote, paavacaajiaquempa cameetsa. ²³ Aatoja piquemisantajiguiritsija quenquejamampeajiatsica cantamampeajigaroca intati taaca opajitapae, pitsaquequea maasano quempejiacarica iriatimpajia manaquea icatsimatavacaajiac. ²⁴ Maasanopae antajiguimirica Amajirote aatoquea icatsimata ntajitsi, manaquea impintsajianaquempari maasano, intsajiaque intsatacaantajiaque, aisa irantsipetacovaequempaquea. ²⁵ Netsanajate incantomajajiaquerija teeca irinintajigueji inquemisantamajajiaqueroquea Quenquet-satsarentsimajaca, aatoja icatsimajiguiritsi. Aricajate inchagashirentajiaqueriquea Aapani Irioshi, ariquea incantashitatijaianajempaquea irovashiantajianajero ipeacaagushejiavecaca,

inquemisantajianaje, 26 iroompaquea
intsajianaje inquenquejajianaqueroquea cameetsaripae aatonijite yagavejajiguiritsi ampatsini ashintajiavearica aisa omperajiavecarica.

3

Quero incojianaquempani caquinteguetatsica oncoramanitapoja jegueti

1 Noninque pintsaque oca: oncoramanitapoja jegueti pajinigueti aapojempa savincaguiteri vegaratapojaatsineca, omanavaequempa.

2 Iriraquea caquinteguetatsica irisati quenquejacotajatsine, aisa iriguenti inquenquejacojianaquequea imentaquipae, iraventacovaequempa, irisemejiaque, incantagushejiaqueriquea Aapani Irioshi, aatoquea iquemisantajiguiritsi iriri aisa iriniro, aatoquea iquenquejajajiritsi pintsatacojiacarica, aisa aatoquea iquemisantajajiritsi Aapani Irioshi.

3 Aatoquea ipintsatacotantajiga, aatoquea ipetsimarejajajatsi, incantagusheheta-cotantajiaque intati, aatoquea yagavejitsi itampishitashijigurotsi covaeguisherentsipae, irantsipetacaantavaejiakuempa, aisa aatoquea ishineventajigarotsi maasanopae cameetsaripae.

4 Iriatimpajia irampigarancashitantaquempa, aisa irantashitantaguetaquempa, caaviji iraventacoquempaquea. Aatoquea inintajiguitsi irishineventajiaquempariquea Aapani Irioshi, manaqueate irinintajiaquequea taaca opaji ishineventacaca iriatimpajia. 5 Aisa intsaroventamampeajiaquempari Aapani Irioshi,

cotanquitsiquea aato itsaroacagaritsi, iroguenti iramenajiaqueriquea tee irioshimajateji. Aatojate piconoajigaritsija quempejiaqueroca imaina.

⁶ Iconoagarantajiacaqueate yoayoaitanaquequea otsovironaquitequi manquigarentsijia teeca ontampishitashijigueroji ogovaeguishere yamatavijijiaqueroquea, ocantacoguitaniquea oshineeventamajatavacari quericaca tsavetantajiaqueroca otsipapae quenquetsatsarentsi, oquemisantamajatavaqueroquea. ⁷ Iroatimpajia ocantajiaveca onintajiaque ontsamajajiaquero Quenquetsatsarentsimajaca, cotanquitsiquea teequea agavejajigueji ontsatimajigueroji, ocancani oquemisantamajatanaqueriquea amatavitantajiatsica. ⁸ Iriatimpajia iticaacovetavacaro Quenquetsatsarentsimajaca, manaquea iquempejiacari Janeshini aisa Jaampereshini ticaavetavacarica Moishishini coramani. Iquenquejaguishevaequegueti taaca opajitapae covaeguisherentsipae, yovashiantajiajiro itsaroventajiavecarigueti. ⁹ Cotanquitsiquea aatoquea icojigani iquemisantajitajiritsi, maasanotari iramenajianaqueri teequea intsatianteji, manaquea inquempejiaquempari irirajia ticaavetavacarica Moishishini coramani teequea inquemisantajitajeriji.

Paavoro icantanajiri Timoteo incoquempanijate intsavetantavaequeriquea Jeso quirishito

¹⁰ Imaica, irijani, notsaque pitsamajatavaqueroquea notsatacaaguequempica, ariqueate

piquejetanacaquea aviatimpa piquempema-jatanaquenaquea naatimpa. Pitsaquequea teequea nompeacaguempaji covaeguisherentsi, manaqueate nosavicaventamajaqueroquea notsavetantavaequeroquea Quenquetsatsar-entsimajaca, aisa notsaroven-tamajacariequeate Jesoquirishito. Teequea noncatsimajigueriji teeca irinintajigueji inquemisantajigueroji Iguenquetsatsare Aapani Irioshi, manaqueate natsipetacovaeca, aisa nocavintsajajiaqueriquea maasano caquinteja, nocoguitani. ¹¹ Aisa pitsaque yatsipetacaavaequequeate ontaniqui Antioquiaqui, Iconioqui aisa Irishitiraqui. Caavijiquea icatsimacatsimavaequena, cotanquitsiquea ipintsatacotajanaqueate Amajirote yoguipaquijacotajana. ¹² Ariqueate inquempejiaquempaquea maasano ninta-jianquitsica intsaroven-tamajajiaquempari Quirishito Jesoshi, irantsipeventavaetana-queriquea. ¹³ Cotanquitsiquea iriraquea peacaagushevaecaroca taaca opajitapae coguisherentsipae, aisa irirajia amataajiatsica, caaviji irogaajianaquempaquea iramatavi-matavitantanaque, aisa iramatavijitajitempari iriatimpa. ¹⁴ Cotanquitsiquea aviatimpa pin-coquempanija pinquemisantamajataquerojate itsatacaajitaquempica, pitsaquetari iroguenti iroomajaca, aisa pitsaquequea queri tsata-aaquempiroca. ¹⁵ Chaajaniquitirajampigueti pitsatsimajacaroquea Iguenquetsatsare Aapani Irioshi. Irootaquequea tsatacaanaquempineca pintsatantamajatanaquempaca, aisa pavent-tantamajatanaquemparica Quirishito Jesoshi

poimentanaqueniji ichoocatigueti pincoguitempani pinchoocaguiteni. ¹⁶ Irootaquequea tionccaantaqueroquea Aapani Irioshi maasanopae Iguenquetsatsare. Irootaquequea tsatacaajiacajica, ocantomajajiacaji, otampaticataacaanacajji, tsatacaaanacajiro quero ancojiaquempani ancomajamajajianaquempanijite. ¹⁷ Irootaquequea oquempetantacaca imaica cameetsanijite intsamajaquenijite yashintajiacaca Aapani Irioshi, iragavejajiaqueniji irinetsanaquero maasano cameetsaguetatsica.

4

Paavoro itampishitacaqueriquea Timoteo

¹ Oncoramanitapojajegueti incoraquetajategueti Jeso quirishito impeapojempaqueate imajirojiate maasano choocatajatsica anijajiat-sica aisa metojajianquitsica, incantajia pojajeri quericaca peacaatsica cameetsari, aisa quericaca peacaatsica coguisherentsipae. Iriatimpa yamenajiacaji imaica. Ariqueate iquempetaca Aapani Irioshi yamenajiacaji iriatimpa.

² Irootaquequea noncantantaquempica pintsavetantavaequeriquea Jeso quirishito pincantajiaqueriquea maasano quero icotani Aapani Irioshi imeshiantigueti. Pintsavetantapiniteroja arigueti irinintajiaque, aisa aatogueti inintajiguitsi. Pincantoma-jantaquequea, pintampishitacaantaquequea. Netsanaja pintsatacaantaquequea, inchiquiojita pisemashirentaritsi. ³ Aapojaquempatarite savincaguiteri aatonicate inintajiguitsi

inquemisantajiajeri tsavetantajiguiroca
 Quenquetsatsarentsimajaca, iriguentiquea
 irinintajiaquequea itsipa tsatacaajiaquerineca
 taaca opajitapae inintajiaqueca iriatimpajia
 irishineventajianaquempaca. ⁴ Aatonica
 iquemisantajajirotsi iroomajatatsica, manaquea
 impitsocashijianajemparo iquenquejashijiacaca
 caquinteja. ⁵ Cotanquitsiquea aviatimpa
 arimpaquea pincomajamatanaquempaquea,
 pinquenquejamajatanaquerojate cameetsaripae.
 Pantsipevaetanaquemparoqua maasanopae,
 pisavicaventavaetanaquero pintsavetantavae-
 tanaqueroqua Quenquetsatsarentsi Ogane-
 jencatatsica. Pintampaticamajatanaqueroqua
 maasanopae inintacaaquempica Amajirote.

⁶ Imaica noquejetacaro imirajitaca
 ishaguitsijitantacarica viratsi itaajiquenerigueti
 Aapani Irioshi, natsipeventacaritari.
 Irooshipoji noantanaquempaca iriatimpaqi.
⁷ Noquejetacariquea ashimirintamajatatsica,
 aisa noquejetsitariquea shiamajatatsica
 narejetsipojajaro ocaratapojaquegueti, nonet-
 sanamajaquerotari maasanopae icanquenaca
 Amajirote, teequea novashiantimateroji
 notsarovencarigueti. ⁸ Iriatimpa iriguenti
 Majirontamajatatsica Joesemajaca tampati-
 camajatiroca maasanopae, incanquequea
 quero incohincoitaquerini maasano caquinte.
 Yamenaquena notsaroven tamajatacari,
 irootaquequea imaica yoguijaca aquenaroquea

amatsaerontsi* iramatsaetantaquenaroquea oncoramanitapoja jegueti, cotanquitsiquea aatoquea aparo naatimpa yamatsaetitsi, inquejetsijiguempariquea aisa maasano oguijamajatavajirica incoraquetajategueti.

Icaratacaaguetanajiniri

9 Pinetsanatsitemparoja pincoraquepojajejate taampina pinejaatenaja, 10 iroorijite itsinampirejanaquenaquea Temashi yoanaque Tesaronicaqui, caavijiquea anaaque ishineventavaetanacaroquea quepatsipaequitica. Iriraquea Quereseente yoanaquequea Garashiaqui. Iriraqueate Tito yoanaquequea Tarimashiaqui. 11 Apatiroti notsipatajari Irocashi. Arigueti pincoraquequegueti paajaterita Maricoshi pintsipatajempari, nonintaqueterite iramitacovaetapoja jena nantavaetaquenerigueti Amajirote. 12 Iriraquea Tiiquico notigarancaqueri Epesoqui. 13 Pincoraquequegueti pamajenaroja nogataamorenare nojoquijitanaqueca Toroashiqui itsovironaquitequi Caripo. Aisa pamajenaroja novaperitepae, irootarite nonintamajataqueca nomeshinatsitepae notioncantaguetacaca.

14 Iriraquea Arijantero peacaaguetaroca taaca opajitapae cavorejaguetatsica icatsimatacantaquena. Inchiquiojitaquea inquejequeri Amajirote. 15 Shooshoh icatsimatacantimpitsijate aviatimpa aisa,

* 4:8 amatsaerontsi. Manaquea iquempetacaacaro coramani ishiashiavijitagueti iramenajiaqueri quericaca anaantanquitsineca, iriraquea majirontatsica iraitsitempariquea iramatsaetsitempari.

iticaaqueñatari
Jesoquirishito.

notsavetantaquerigueti

16 Iroqueragueti yaajitanaqueñagueti jivatatsicaqui teetarite inchoocateji aparo amitacotanaqueñaneca, maasanoquea itsinampirejajianaqueña quea, aparoquea noquenquetasaventanaca naatimpa. Cotanquitsiquea teequea nonintejí inquenquejacaajiaqueriquea Aapani Irishi oncoramanitapoja jegueti.

17 Cotanquitsiquea iriraquea Amajirote yamitacovaequenaquea itampishitacaanaqueña, nagavejantacaca notsavetantavaequeriquea Jesoquirishito cameetsanijite inquemajiaqueñijite maasano teeca irijorijoigueji. Aisa yaajitavajana yatancavequenagueti casecari.[†]

18 Arimpaqueate impintsatacomajatanaqueña Amajirote querocaca incojivequenani, iroompa iraanaqueña queate jenoqui inquitequi imajirontacagueti. Jaameja ancoguitempani ashineventajiaquempari, ancantajiaqueri: “Caaviji poganejencamajata!” Ari oncoquempa.

19 Pincamanqueroja Pirishica nococani noquenquejajiro, aisa Aquira noquenquejaqueriquea, aisa ijitannejia Oneshiporo pincamanquerijate noquenquejajiaqueriquea. **20** Iriraquea Erashito ichooque Corintoqui. Iriraquea Toropimo nojocanaqueri Miretoqui yojquijitaca. **21** Aviatimpa, irijani, pincoraquepojajeja

[†] **4:17** Icanquegueti yaajitavajana yatancavequenagueti casecari arica mana iquejetacaajiacanari intati, quejetaca incante: “ipintsatacovaetaquena teeca irojocantajitenaji irimetojajiquenani-jite, quejetacashia yatancavequenagueti casecari”.

taampina tequeratagueti oncatsincaguiteteji. Irirajia Eovoro, Porente, Irino, jero Caraoria, aisa maasano apitsaroventarijiate inintajiaquequea pinquemacojiaqueri choocajia iquenquejajiaque-mpiquea.

²² Noninque intsipamajaquemriquea Amajirote Jeso quirishito pishirequi, incavintsa-jamajajiaquemriquea aviatimpajia maasano.

**Iroaquerari Itioncacaantaqueca Aapani
Irioshi: Tsavetacoquerica Amajirote
Jesoquirishito**

New Testament in Caquinte (PE:cot:Caquinte)

copyright © 2008 Wycliffe Bible Translators, Inc.

Language: Caquinte

Translation by: Wycliffe Bible Translators, Inc.

Caquinte[cot], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Caquinte

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

83ba253d-55c7-5686-b0d2-bfc8d1efc0d5